

# Dals Trubadurs Sursilvans als Ambassadors Sursilvans

DA LUCAS DEPLAZES/ANR

■ Il concert da giubileum da La Compagnia Rossini a Lucerna dalla domenica vargada ei stau in eveniment unic, gie fenomenal per igl ensemble sez e per il publicum, vegnius da tuttas varts. Giuven e vegl ein stai incantai dallas prestaziuns ed han spendiu spess applaus per quella musica da smarvegli.

## In'atmosfera classica

Armin Caduff, igl arranschader e maestro da La Compagnia Rossini, ha tschentau en siu concert da giubileum quater accents principals. Il maestro ha elegiu ord las ovras musicalas classicas da Rossini, Verdi, Mozart, Bizet, Beethoven, Offenbach e Schubert enconuscentas parts ed arranschau quellas melodias per sia Compagnia.

## Melodias popularas

En siu program pulpiu ha La Compagnia Rossini era schau reviver melodias ord il cant popular romontsch e talian. Quellas canzuns da temprament dil sid ein vegnidas enrihidadas cun inspiraziuns musicalas dil regissur sez. El program festiv ha igl ensemble puspei schau renescher ils Trubadurs Sursilvans cun lur canzuns da sault e sulaz en costums claus. Els ch'ei stai agl origin da La Compagnia Rossini, els che han tschentau la basa necessaria per catter plaun a plaun la via dil cuntinuau success.

## Gronda variasiun

Armin Caduff sa profitar da siu immens fundus musical, da sia oreifra scolaziun e da sia vasta experientscha sin tribunas nazionalas ed internaziunalas. El ha recaltgau enconuschentschas profundas dalla litteratura d'operas e da concerts e dispona dall'intuiziun e dalla fantasia per adattare la musica classica a siu ensemble, senza sfalsificar ni cuntegn ni origin dall'ovra. Ils arranschaments dad Armin



La Compagnia Rossini al concert da giubileum el KKL.

MAD

Caduff ein ina grondiusa variasiun denter parts cun fermas vuschs communablas e vuschs da solists. Igl auditori enconuscha e suonda la melodia originala.

## In eveniment unic

Il concert da giubileum da La Compagnia Rossini a Lucerna ha incantau il publicum, serimnaus en roschas per admirar sias prestaziuns. Ed el ei buca vegnius trumpaus. Las reacziuns d'auditoras e d'auditors – ord tuttas generaziuns e regiuns – ein stadas unisono positivadas. L'acustica optimala dalla gronda sala alva ha secapescha era contribuuiu al success complein e bein meritau.

## Cun reschia subtila

Il grande maestro Armin Caduff che surpren era la scolaziun e la moderaziun da La Compagnia Rossini empeila siu en-

semble cun maun segir, cun gèsts subtils, cun ina eglia migeivla sco sch'in spert menass reschia. Tuttas midadas da posiziun, tuts moviments digl ensemble succedan quasi automaticamein, senza reschia veseivla. Cantaduras e cantadurs semovan ruasseivlamein, segiramein, lur agir ei mintgamai bein adattaus al cuntegn dalla musica.

## Accents caracteristics

La Compagnia Rossini ei sepresentada en sia formaziun cumpleta a quella produczuon da gala. Ella ha perschadiu ils hosps e fatg ina impressiun excellenta cun siu cant compact. Ils dus pianists Christoph Demarmels ed Eric Christen han susteniu igl ensemble cun gronda precisiun e survegniu repetidamein applaus. Il publicum ei staus incantau dils duets da bab Armin cun feglia Maria Catrina e fegl Flurin, quels giuvenils che han gia sviluppuau vuschs claras e segiras. La versada sopranista Iva Kleinova fa surstar cun sia vusch compleina, schibein sco solista sco el duet cun Meinrad Giger. Cornelia Cathomen e Xenia Halon han incantau igl auditori ina ga dapli cun lur vuschs sonoras e da tempr e mimica speciala. Per pial gaglina ha Anica Defuns procurau cun siu solo ord la Traviata da Giuseppe Verdi. Era la solida vusch dall'altisa Lisabet Caduff croda si e munta ina petga segira e ruasseivla pigl ensemble. Ella ch'ei stada l'emprima e curaschusa solista da La Compagnia Rossini.

## Il grond final

Per la fin ha Armin Caduff clamau sin tribuna ils anteriurs cantadurs e las anteriuras cantaduras: Anna Maria Schlosser, Christoffel Nay, Marie-Louise Werth, Gabriel Derungs, Claudio Simonet, Gion

Jäger e Susanna Wyss. Ensemen han els schau renescher ils histas da pli baul per il grond final e svegliau reminiscenzas ed emoziuns. Cun l'enconuscenta «Buna sera» e cun ina rosa cotschna ha la Compagnia Rossini priu cumiau

d'in auditori incantau e fideivel, suenter liungs applaus dall'entira sala sezalada per render reverenza pil pres-tau. Bein enqual larmin ei ruclaus sur las gaultas giu sco segn da legria ed en-graziament.

## Impressiuns

L'Agentura da novitads rumantscha (anr) ha rimnau enzacontas reacziuns spontanadas ord il publicum. En general ein las reacziuns ed impressiuns stadas tuttas tuttina: Grondius, fantastic, excellent, fenomenal, sco in siemi. Quellas ein stadas las reacziuns e las impressiuns ch'il concert da giubileum a Lucerna ha leventau en cor ed olma da participontas e participonts. «Ins lessi tedlar e semiar vinavon», ha ina giuvna dunna da Bösinggen detg e cumprau il disc compact.

Adolf Ogi, ant. cusseglier federal, Fraubrunnen: Jeu enconuchel Armin Caduff e sia dunna Lisabet gia daditg. Jeu hai udiu els repetidamein durent miu temps el cussegl federal e perquei sun jeu vegnius cun plascher a Lucerna. Jeu admirel quellas bellezza vuschs giu dallas muntognas. Tals talents e tala qualitat musicala ston ins sustener. Sco muntagnard sun jeu loschs ch'enzatgei aschia ei pusseivel.

Gian-Battista von Tscharnier, La Punt: Jeu enconuchel La Compagnia Rossini gia daditg. Ella ei stada savens tier nus, a caschun da natalezis e d'atras fiastas. Per mei munta ella nundumbrevilas regurdientschas cun bellezza musica che munta per mei allegria e dacasa.

Martina Trippel, Dardin: Oh, quei ei stau in concert fantastic. Jeu teiddele adina bugen els, lur cant fa impressiun e sveglia emoziuns.

Gion Schwarz, hotelier, Mustér: Per mei eisi oz cheu legria. Mia idea fundamentala da cumbinar buna musica cun ina buna tscheina ei se-realizada sin ina moda grondiusa. Quei ei musica che fa mintga ga plasher. Jeu sperel ch'ei mondi vinavon aschia.

Luregn Mathias Cavelty, Cuera: Quei ei stau questa sera in concert grondius. Jeu sun in incantau auditor e mon savens a tedlar els. Jeu hai giu la schanza d'emprerder d'enconuscher La Compagnia Rossini tier mia elecziun sco president dil cussegl dils stans. Quei ha lu era intimau mei da promover els.

Lisa e Hanskasper Zollinger, Turitg: Nus essan totalmein incantai da quei concert. Quei ei musica grondiusa, gie fenomenala. Secapescha che nus lein udir els vinavon.

Christian Durisch, Cuera: L'admiraziun per la Compagnia Rossini ei gronda. Jeu enconuchel ella, quei vul dir Armin e Lisabet Caduff, gia dapi 1980. Jeu hai organisau ensemen cun els divers projects. Ulteriurs ein plansai pigl onn proxim.



Ils Trubadurs Sursilvans dad oz.



Luregn Mathias Cavelty, Adolf Ogi, Duri Bezzola (da sen.).



Ursin Defuns, Monica e Gion Schwarz, Marie-Louise Werth (da sen.).

FOTOS L. DEPLAZES